



REPUBLIKA E SHQIPËRISË

**AUTORITETI PËR INFORMIMIN MBI DOKUMENTET
E ISH-SIGURIMIT TË SHETIT**

Nr. 220/ Prot.
124

V E N D I M
Nr. 63 datë 08.02.2021



11.02 2021

Autoriteti për Informimin mbi Dokumentet e ish - Sigurimit të Shtetit të Republikës së Shqipërisë në mbledhjen e datës 08.02.2021, me pjesëmarrjen e anëtarëve:

Zj. Gentiana Sula	Kryetare
Z. Simon Mirakaj	Anëtar
Z. Altin Hoxha	Anëtar
Z. Marenglen Kasmi	Anëtar

shqyrtoi çështjen me:

OBJEKT:

Miratimi i Marrëveshjes së Bashkëpunimit ndërmjet Autoritetit për Informimin mbi Dokumentet e ish-Sigurimit të Shtetit dhe Akademisë së Studimeve Albanologjike ASA.

BAZA LIGJORE:

Në mbështetje të Ligjit nr. 45/2015 "Për të Drejtën e Informimit për Dokumentet e ish-Sigurimit të Shtetit të Republikës Popullore Socialiste të Shqipërisë", i ndryshuar, Rregullores "Për Organizimin dhe Funksionimin e Autoritetit për Informimin mbi Dokumentet e Ish-Sigurimit të Shtetit", e miratuar me Vendimin nr. 21, datë 09.05.2017 të Autoritetit, e ndryshuar, ligji nr. 80/2015 "Për Arsimin e Lartë dhe Kërkimin Shkencor në Institucionet e Arsimit të Lartë në Republikën e Shqipërisë", si dhe Statuti i ASA.

Autoriteti për Informimin mbi Dokumentet e ish-Sigurimit të Shtetit, pasi shqyrtoi projekt-marrëveshjen e bashkëpunimit ndërmjet Autoritetit për Informimin mbi Dokumentet e ish-Sigurimit të Shtetit (AIDSSH) dhe Akademia e Studimeve Albanologjike (ASA).

V Ë R E N

Ligji nr. 45/2015 "Për të Drejtën e Informimit për Dokumentet e ish-Sigurimit të Shtetit të Republikës Popullore Socialiste të Shqipërisë" përcakton se, Autoriteti për Informimin mbi Dokumentet e ish-Sigurimit të Shtetit, si institucion i pavarur, është përgjegjës për zbatimin e ligjit, lidhur me mbledhjen, administrimin, përpunimin, përdorimin e dokumenteve të ish-Sigurimit të Shtetit dhe informimin në lidhje me to të subjekteve të përcaktuara në këtë ligj.



Neni 7 i ligjit nr. 45/2015 parashikon se, Autoriteti e ka selinë në Tiranë dhe financohet nga Buxheti i Shtetit dhe burime të tjera të ligjshme. Autoriteti organizohet dhe funksionon sipas rregullave të përcaktuara në këtë ligj dhe në rregulloren e funksionimit, që miratohet prej tij dhe kryen funksionet e tij, të përcaktuara në këtë ligj, në mënyrë kolegjiale. Autoriteti ka pavarësi të plotë në vendimmarrje për ushtrimin e funksioneve të veta, që burojnë nga ky ligj apo aktet nënligjore të dala në zbatim të tij.

Autoriteti, me Vendimin nr. 21, datë 09.05.2017, ka miratuar Rregulloren "Për Organizimin dhe funksionimin e Autoritetit për Informimin mbi Dokumentet e ish-Sigurimit të Shtetit", ku në nenin 17 të tij parashikohet shprehimisht se: *"AIDSSH-ja, gjatë ushtrimit të veprimtarisë së tij, ka të drejtë të marrë nga autoritetet publike të gjithë ndihmën, informacionin, si dhe të dhënat e nevojshme për ushtrimin e funksioneve të tij, në përputhje me Ligjin për Informimin për Dokumentet e ish-Sigurimit të Shtetit."*

1. *AIDSSH-ja bashkëpunon me organizata të huaja, rajonale dhe ndërkombëtare që synojnë mbështetjen e procesit të transparencës mbi të kaluarën komuniste dhe viktimat e diktaturës.*
2. *AIDSSH-ja bashkëpunon me konsulentë vendas apo të huaj, institucione publike, organizata partnere, vendase apo të huaja, për përmirësimin dhe modernizimin e veprimtarisë së tij, si dhe për organizimin dhe zbatimin e projekteve të ndryshme.*
3. *Për qëllime të informimit të publikut dhe përfshirjes së grupeve të interesit në procese konsultuese, AIDSSH-ja bashkëpunon me institucione, organizata të huaja, ndërkombëtare apo vendase, me grupet e interesit, shoqërinë civile dhe median.*
4. *AIDSSH-ja gjatë ushtrimit të veprimtarisë së saj, bashkëpunon dhe bashkërendon punën me institucionet publike vendas dhe të huaj si dhe nënshkruan marrëveshje bashkëpunimi.*

Gjithashtu duke u bazuar në ligjin nr. 80/2015 "Për Arsimin e Lartë dhe Kërkimin Shkencor në Institucionet e Arsimit të Lartë në Republikën e Shqipërisë", si dhe Statuti i ASA, AIDSSH dhe ASA në mirëkuptim ndërmjet tyre kanë vendosur të lidhin një marrëveshje bashkëpunimi.

a) Marrëveshja e Bashkëpunimit ndërmjet Autoritetit për Informimin mbi Dokumentet e ish-Sigurimit të Shtetit dhe Akademisë Së Studimeve Albanologjike

Mbështetur në nevojat e të dy institucioneve tona dhe në bashkëpunimin e mëparshëm janë krijuar mundësitë për lidhjen e një Marrëveshjeje Bashkëpunimi ndërmjet Autoritetit për Informimin mbi Dokumentet e ish-Sigurimit të Shtetit dhe Akademisë Së Studimeve Albanologjike, e cila do të ketë për objekt institucionalizimin e marrëdhënieve për aplikimin e procedurave që thjeshtojnë bashkëpunimin e ndërsjellë të palëve, në kuadër të mbështetjes së kërkimit shkencor gjatë rishqyrtimit historik të veprimtarisë represive të regjimit komunist dhe veçanërisht të ish-Sigurimit të Shtetit, nëpërmjet garantimit të mundësisë për shqyrtimin e dokumenteve dhe dorëzimin e dublikatave të dokumenteve, veçanërisht në formimin universitar të thelluar të studentëve.

Gjithashtu sfera e bashkëpunimit ndër-institucional do të jetë do të përfshijë:

Bashkëpunimi ndërmjet të dy institucioneve do të përfshijë:

- a) fushat akademike dhe të hulumtimit e publikimit me interes të përbashkët, bazuar në parimet e barazisë dhe reciprocitetit;
- b) shkëmbimin e shërbimeve dhe të ekspertëve, stafit akademik dhe të kërkuesve të instituteve përkatëse me dokumentacionin arkivor të AIDSSH-së, në kuadrin e veprimtarive kërkimore shkencore, botimeve, etj.;
- c) nxitjen, mbështetjen dhe realizimin e projekteve të përbashkëta kërkimore, të edukimit qytetar dhe për të zhdukurit, në kuadër të veprimtarisë që AIDSSH ushtron me ligj;



- d) nxitjen, mbështetjen dhe realizimin e veprimtarive të tjera shkencore (konferenca, seminare, tryeza, studime, botime, intervista e dokumentarë në fusha me interes të dyanshëm);
- e) shkëmbimin e literaturës shkencore, statistikave, raporteve periodike, botimeve përkatëse;
- f) hulumtimin reciprokisht të arkivave mbi bazën e legjislacionit në fuqi;
- g) bashkëpunimin e dedikuar me institutet e ASA, duke shfrytëzuar ekspertizën përkatëse, sa i takon studimeve historike, shoqërore, kulturore, etj., të periudhës 1944-1991, edhe në trajtim enciklopedik, të lidhur me përndjekjen në komunizëm, format e opozitarizmit dhe kundërshtisë me regjimin, figurave të mirënjohura intelektuale, përvojave dhe proceseve të ekspertizës të antropologjisë dhe arkeologjisë, sa u takon të zhdukurve në komunizëm, etj.,

Sa më sipër, vlerësojmë se, Marrëveshja ndërmjet Autoritetit për Informimin mbi Dokumentet e Ish-Sigurimit të Shtetit dhe Akademisë Së Studimeve Albanologjike, është e mbështetur në ligj dhe në Rregulloren e Brendshme të Institucionit.

PËR KËTO ARSYE

Bazuar në ligjin nr. 45/2015 “Për të Drejtën e Informimit për Dokumentet e ish-Sigurimit të Shtetit të Republikës Popullore Socialiste të Shqipërisë”, të ndryshuar, dhe Rregulloren e Brendshme të Institucionit “Për Organizimin dhe funksionimin e Autoritetit për Informimin mbi Dokumentet e ish-Sigurimit të Shtetit”, të ndryshuar, Autoriteti për Informimin mbi Dokumentet e ish-Sigurimit të Shtetit,

V E N D O S I

1. Miratimin e Marrëveshjes së Bashkëpunimit ndërmjet Autoritetit për Informimin mbi Dokumentet e Ish-Sigurimit të Shtetit (AIDSSH) dhe Akademisë së Studimeve Albanologjike ASA;
2. Dërgimin e kësaj Marrëveshjeje për vazhdimin e procedurave pranë Akademisë së Studimeve Albanologjike ASA.
3. Ngarkohet Sekretariati Teknik për zbatimin e këtij vendimi.
4. Ky vendim hyn në fuqi menjëherë.



ANËTAR

Altin Hoxha

ANËTAR

Dr. Marenglen Kasmi

ANËTAR

Simon Mirakaj